

**Bloque Nacionalista Galego de Cabanas**

cabanas@bng.gal

cabanas.bng.gal

Iago Varela Martínez, voceiro municipal do Bloque Nacionalista Galego, presenta ante o Pleno do Concello de Cabanas para o seu debate e posterior acordo a seguinte

## **MOCIÓN DE OPOSICIÓN Á LOMCE E ÁS SÚAS REVÁLIDAS**

### **EXPOSICIÓN DE MOTIVOS**

A aplicación da LOMCE consagra aspectos tan fundamente negativos para o sistema educativo, coma o seu carácter fundamente centralizador, clasista e sexista, a mercantilización da educación e o afondamento nun modelo moito máis autoritario e antidemocrático.

Cómpre lembrar que xa a elaboración desta lei tivo lugar sen o mínimo diálogo social e sen a participación da comunidade educativa, das asociacións que representan aos diferentes colectivos implicados e con grande oposición social e política. Ademais, a LOMCE representa un ataque frontal ás competencias das comunidades autónomas e supón unha involución inadmisíbel ao negar a realidade plurilingüe, pluricultural e plurinacional do Estado español, vetando o dereito das comunidades de ofrecer o seu propio modelo lingüístico.

Para alén doutras consideracións, a inclusión da proba xeral en 3º e 6º de Primaria e as reválidas en 4º da ESO e en Bacharelato (que son ademais requisito imprescindible para conseguir os títulos correspondentes) pretende pór as maiores trabas posíbeis para a continuación dos estudos. Obedecen, pois, a unha concepción clasista e elitista da educación e contribúen a excluír ao alumnado máis desfavorecido socialmente do dereito á educación nun contexto no que xa as progresivas privatizacións e recortes do sistema público de ensino limitan os recursos para facer real o principio de igualdade de oportunidades.

Ademais, a nivel pedagóxico, as reválidas supoñen unha presión engadida para o alumnado, forzándoo a ser avaliado baixo estándares uniformizados sen ter en conta a educación como proceso e o contexto social, económico e persoal do alumando, así como as súas capacidades e actitudes. Tamén cómpre sinalar como as probas avalían só determinadas áreas do coñecemento, tendo nunha menor consideración outras competencias, destrezas e habilidades do campo artístico e musical. Ademais, o modelo centralista fai que sexa o Ministerio de Educación quen fixe os criterios, limitando os



**Bloque Nacionalista Galego de Cabanas**

cabanas@bng.gal

cabanas.bng.gal

Contidos específicos do marco galego que son imprescindíbeis para a formación do alumnado no seu contexto.

Así mesmo, as revalidas condicionan a labor docente ao encamiñala á preparación das probas e cuestionan a avaliación continua e a opinión do equipo docente para coñecer as carencias, potencialidades, habilidades e capacidades do alumnado, así como dos medios, recursos e apoios necesarios para mellorar a aprendizaxe e o rendemento escolar.

Por todo isto, a lei ten unha clara pretensión de camiñar cara un sistema educativo competitivo, clasista e segregador que excluírá os sectores máis desfavorecidos da educación e asentará unha estrutura curricular ao servizo do capitalismo.

Por estas razóns, o Bloque Nacionalista Galego somete a debate e aprobación polo pleno do Concello de Cabanas esta moción propoñendo a adopción dos seguintes

#### **ACORDOS**

1. Instar á Xunta de Galiza á eliminación das reválidas, conscientes das nefastas e lesivas consecuencias que supoñen estas probas, por seren un obstáculo para facer efectivo o dereito á educación universal, pública, galega, laica, coeducativa e gratuíta.
2. Esixir á Xunta de Galiza a solicitude ao goberno do Estado a derogación da LOMCE.
3. Instar á Xunta de Galiza a defender as nosas competencias en materia de ensino para fortalecer un ensino público, galego e de calidade que potencie a diversidade e fomente a lingua propia do noso país.

En Cabanas, a 17 de outubro de 2016

Asdo. Iago Varela Martínez  
Concelleiro do Bloque Nacionalista Galego

**SR. ALCALDE – PRESIDENTE DO CONCELLO DE CABANAS**